

„Wäntele“ Info !



Ussgoob 3 / 2011

Basel, 08.09.2011

Uss em Zumpftroot

Adie zämme,

dr Zumpftroot isch greftig am sitze, am organisiere, am terminiere und am rekognosziere voor Ort! Men isch äxsdraa no Minche gfaaren und het alles in dr Wältstadt mit Härz rekognosziert und mit den Organisatoore Kontakt uffgnoo.

Au isch e glaini Delegatioon vom Zumpftroot no Döttige an dr Info Oobe vo den Organisatoore gfaare um go goloose, waas daas fir e Winzerfescht git. Mr kennen Eych saage, s wird e ganz glatti Sach gää!

Aktuell

S goot nimm esoo lang und mr sitzen im Bus no Minche! S gramsle nimmt zue und s Goschdym mit den Utensilie wird uusebutzt und baraat gmacht!

Am 14. Sebdamber duet dr Zumpftroot alli Dailnäamer iiber d Rais und iiber s Oggdooberfescht orientiere. Me het vom Organisationscomité e huffen Ufflaage bikoo, isch doch dr Drachtenumzug ein ainzigartigi und traditionelli Sach, wo no wältwyt im Färnsee iiberdrait wird. Doo isch es nur sälbschtverständlig, ass esoon Event nuur mit ganz klaare Voorschrifte iiber d Biini ka goo! Mr mien is halt an e baar Sachen und Sächeli halte, wo mr nit esoo gwoont sinn und won is vellicht e weeneli gschpässig voorkemme, aaber was macht me nit alles fir unseri liebe Schwoobe!!

Ussicht

Döttige Winzerfescht am 2. Oggdoober 2011

Wie oobe scho gsait, isch e glaini Delegatioon vom Zumpftroot amene Frytig z Oobe no Döttige gfaare, well men en Ylaadig zem Info Oobe bikoo het. Men isch derte vo den Organisatoore härzlig empfangen worde und me het schon e baar Pfyler kennen yschloo! Dr Schryber maint doodrmit, ass me biraits fir s Midaagässe reserviert und au gluegt het, wo mr voor em Midaagässe e glainen Umdrungg kaa go gon yynää ! Me het au erfaare, ass 60 Formationen yyglaade worde sin und ass d Wäntele dr kreenendi Abschluss vom Umzug wärde sii! D Route isch 1600 Meter lang, also ebben esoo wie s letscht Joor an dr OLMA in St. Galle.

Dr Zumpftroot isch sicher, ass daas non e ganz luschtig Fescht wird sii! En interessant Brogramm wird au zämmegschteilt!

D Abfaart no Döttige wird ebben esoo geege die achti / halber niini de morgue sii. Die genaue Details kemme drnoo wiider wie gwoont per Mail!

Meran, 125 Joor Druubefescht am 15./16. Oggdoober 2011

Doo sin jo d Eggdaate bikannt. D Detail wärde no rächtzytig wiider per Mail verschiggt!

S Zumpftässe vom 26. Novämber 2011

Dr Voordraab isch scho greftig am organisiere. Me verrootet nyt, aaber esoo vyyl wird gsait; s wird e glungeni und aimooligi Sach gää. Me wird no dryyber schwätze!

Ruggblig

D Basel Tattoo Parade vom 23. Juli 2011 isch fir alli Dailnäamer e ganz glungeni Sach gsii; nai me kaa saage, s isch dr Hammer gsii. S het guet deent, mr hänn e sauguete Falle gmacht, waas is au vo meerere Lyt, wo am Stroosserand gschtande sinn, gsait worden isch! Wie men esoo vo den Organisatoore gheert het, wärde mr seerwoorschynlig s näggscht Joor wiider derfe drbyy sii. Dr Zumpftroot wird am Ball blyybe!

Vom Bergheim Fête du Gewurztraminer vom 31. Juli 2011 kaa dr Schryyber nit vyyl brichte, isch äär doch in de Ferie gsii. Waas men aaber esoo gheert het, isch es au guet gsii und me het e baar glatti Schtunde kennen im Elsass verbringe.

Dr Daag vo de Stadtdoor vom 20. Augschte 2011 isch glaub dr haissischt Samschtig vom Joor gsii. S isch ungläublig, waas mr derten an Schwaiss verloore hänn, aber wies esoo bi de Wäntele isch, me het duureghebt bis zem Schluss, au wenn mr no in e Diirgedemo ynegloffte sinn.

S erscht Mool sinn mr vom Dalbedoor ewägg gloffe, hänn is aaber voorhäär no am vo dr Stadt offerierten Umdrungg gschteerggt. Jä, me het rächt glääse, d Stadt het ändlig emool ebbis wääge de Stadtdoor gmacht. Au dr Regierigsroot Wessels het sich bimiet und isch zem Dalbedoor ghoo und het kurz ebbis vzzellt. Jäjä, Waale steen halt voor dr Diire!!

In Ribeaupillé am 4. Sebdamber 2011 hets am Moorge no guet ussgsee. S Walsi het gmaint, s git non e blaue Himmel. Non em Umdrungg am Aafang vom Stedtli hets no wiirgglig esoo ussgsee. Au bim traditionellen Apéro bi dr Familie Sipp – won is d Madame und dr Mössiö Sipp offeriert hänn – het no d Sunne glacht! Aaber drnoo, kurz voor em Umzug hets vrglemmi aafoo schiffe, waas es aabe het meege. Mr sinn am Ändi vom Umzuug pflotschnass gsi und drzue no wiss voor Määl, wo dr Waage, wo voor uns gfaaren isch, in d Lyt ynegschosse het! Waisch wie!!!!

Gaschtbyydraag

Dr erscht Gaschtbyydraag isch yydroffe. Mr hoffen ass daas Aaspoorn git fir näggschti Gaschtbyydräg:

E Samschtig im Juli 2011

I sitz in dr Kuchi bim Kaffi und mergg wie myyni Närve feen a vibriere
schnäll nimm i mi Guttere Baldrian us em Apothekerkäschtle hindefiire
30ig Drepfli länge und scho duen i mi glyy wiider erholisiere
zletschemänt wott i mi bim erschten Event bi de Wäntele jo nit blamiere!
Jetzten aaber ab in die Dracht und bi no so am ummestudiere
han i alles aa fir an dr Tattoo Parade mit z marschiere
schpeeter im Bistro duen i zerscht mit den andere en Ueli Bier konsumiere
und zer biruigig non e Zigarettli inhaliere
do kunnt d Maja uff mi zue und duet reklamiere
i sott miini wysse Sogge uffezie und e weeneli heecher disloziere.
Jetzt goots loos, me lauft richtig Baimligass um sich z arrangiere
as miir is in Rai und Gliid au scheen kenne präsentiere
kurz voorhäär duet men aaber no schnäll umdisponiere
und dr „Stroosefääger“ kurzerhand zensiere.
Im Roger isch das wurscht, är duet au nit proteschiere
dää kaan i soowisoo nit, heersch en disputiere.

Achtung! Dr Lang sait aa und miir dien dr San Carlo zelebriere.
I gsee dr Bärni rächts vo miir wo sich schambpar duet konzentriere
und linggs lueg i wie dr Hugo sy Fäll duet maltretiere
vorne rächts dr Marcel, äär duet miir klar deklariere;
2. Vårs, Pfifferdaj, dr Schlepp, gäll däa duesch linggs platziere
bi dr Retraite sait voor miir dr Heiner, dien miir Baidi probiere
noon em Synkopevårs e galante Zwischeschritt z improvisiere
dr Robi vorne linggs, iin ka nyt und niemerts imponiere
lauft stolz und loost wie d Lyt uns applaudiere
hinter miir dien die Grosse; dr Reto, dr Andy, dr René und dr Rolf mitspaziere
und luege as sii dr Aaschluss nit verliere.

Doch scho glyy
isch alles verbyy!

Vom Schwaiss baadet, zwoor duet daas niemerts interessiere
gniess iich s wie miir alli ganz härzligg dien gratueliere
miini Emotioone und Ydrigg die sin nit z beschrybe
i hoff as i no witter bi Eych darf blyybe!

Iir sind alli tolli „Copains“ - aifach dr Knüller
vom 23. Juli griesst Eych - s Vreni Müller

Soo daas wärs wiider emool gsii. Blyybed gsund und gfräsig! Adie zämme, händs Guet und bis zem
näggschte Mool

dr Zumpftroot vo de Basler Källerwäntele Zumpft